

媿

隅

集

贈奉政大夫光祿寺少卿前戶部河南司主事趙公
道碑文

南滙吳省欽讚

乾隆三十八年春定邊將軍大學士溫福次昔嶺討金
川會六月己丑朔美臥溝失守戊戌將軍以師退距木
果木北嶺不數里歿於陳戶部河南司主事趙公死之
越九日子聞自雅州試署爲位哭之又三旬聞 詔贈
光祿寺少卿入祀昭忠祠 予祭葬馳驛歸里蔭一子
入監讀書期滿予官是冬小金川復平明年二月孤乘
淵自京返旆而以書抵蜀先請爲隧道之文嗚呼公詩
名在天下節義在國史有子世其業死亦可無憾而予

言尤有信者憶戊子冬予使黔歸次淇縣時公坐漏言
逮問盧見會事落職從雲貴總督今將軍阿桂討緬賊
入滇驚相遇於道倚枯柳相泣語移時別其明年今將
軍拜副將軍公從經略大學士傅恒出萬仞關歷猛養
猛拱攻老官屯十一月緬酋降而公病先入關以薦得
旨候引 見又明年從副將軍駐騰越防秋又明年
辛卯十月討小金川公從將軍溫福自永昌疾馳二十
晝夜抵成都明年十二月小金川平遂移討金川會余
視學入蜀謂賊平可與公亟見而秉淵亦從余而西以
次年閏稷日返自木果木軍營傳語余甚悉時公已遷

官不三月而變作凡從軍六年至是而授命焉嗚呼難
言矣公長予五歲丁卯秋以詩相質於舉場始定交自
後王光祿鳴盛吳舍人泰來王考功昶黃司論文選錢
詹事大昕曹中允仁虎在蕪州與公爲七子詩傳至日
本其國相高棟爲七律人贈一章寄估舶以達人艷稱
之而其後多自以少作爲悔錢以辛未奏賦行在授
內閣中書至丁丑而王與曹繼之予亦與是選始過公
高行之居癸未春兩家聯舫入京僦屋同與居後三年
予弟攜家亦至居始析公兩放會試未得列館職而書
局總裁官歷舉公分修平定律噶爾回部方略御批

歷代通鑑輯覽 大清一統志及未成之音韻述微鑑
古輯覽熱河志諸書且俾總校均計日程課自余入詞
館所纂書尙多然不及公十五六而公又以其間寅入
酉出儼直草詔令賦詩談讌俱不廢或賣文以佐祿入
所不逮去年春四庫全書館局開一時績學之士多奏
名入翰林賜進士其與公同獲罪者皆起而公積軍功
稍遷遇變又不爲同行者之苟免設公舉禮部必不直
軍機不直軍機人知公學之博說之長而不知才之足
倚以決事卽一言不密又非出有意退而授徒著書亦
足以開益於人而傳於後乃授薦授留輟轉再四至以

身殉爲可哀也然公自爲高才生有忌而蟻以隱事者
其人後獲一官以死視之猶劓首之一映卽東華車馬
不失職之文人所辛勤而僅有者不朽果安在也夫亦
可無憾爾矣公諱文哲字損之號璞函世爲上海人學
使者以謂孝友純密舉優行壬午獻迎 鑿詩賦

御試一等第二名 欽賜舉人授內閣中書遷戶部河
南司主事 特贈奉政大夫光祿寺少卿曾祖廷炳祖
宏璧國子生候選州同知父紳歲貢生兩世以公故贈
徵仕郎內閣中書祖母張氏母張氏吳氏皆贈孀人配
張恭人側室萬孀人子秉淵承廕國子生秉沖秉淳秉

治秉洽女一淑孫一所著羣經識小錄若干卷文集若干卷嬀雅堂詩十二卷藏海廬詩四卷嬀隔集十卷詞四卷其歿也距生雍正三年九月二十九日年四十有九以乾隆乙未年閏十月十五日葬於上海縣高昌里系之銘曰黃歇浦東厥壤鹵斥挺生我公百夫之特其出以庶匪產是居繫文是富繫儒是臞中歲服官榮自稽古書局重申機庭旁午片言召譽萬里行軍論才密請公胡不聞瘴雲際海雪山沒微六載寢戈

萬壽拜誥揃爪截髮緘題自滇致命自蜀中素定焉傳有文苑史有死事公也兼之啓佑仍世浣花之溪有祠

慰忠以公首祀僉侑且恫謂公罔恫人孰無死泰山鴻
毛烏鳶螻蟻英英毅魄煌煌 賜阡我厚且故序言不

齊

叙

趙君璞菴與余生同郡長同學先後同官於朝君顯喜
爲詩有所作則以眎余故知君之詩之工者惟余爲深
而能言君之詩之工亦必以余爲最乾隆戊子君與余
又均因口語被吏議頃之以阿大司馬奏請均從軍于
滇舟車戎馬所至輒爲詩以自陳寫庚寅秋駐永昌會
幕府無事君乃摠其所作編爲一集名之曰嫵隅且屬
余爲叙余循誦再三茫然慨然歎君詩之工而不能知
其所以爲工也或曰君博聞彊識其才如萬斛泉觸地
而出隨其形之大小聲之疾徐長短靡不中節且自豫

楚而黔而滇出西南徼外又二千餘里風俗之俶詭山川林莽之嶮怪烽烟礮石之可駭可愕皆前古詩人所未及故其取材也富而見於篇什者肆而竒余曰是則然矣子不聞黃帝之張樂於洞庭乎其卒無尾其始無首北門成聞之蕩蕩默默意不自得其能知樂之所以爲工乎雍門周之鼓琴也孟嘗煩寃絜欻仰天太息至泣數行下當是時其能知琴之所以爲工乎觀君之詩亦若是而已矣莊生有言逃虛空者藜藿任乎颺颺之逕聞人足音蹵然而憇矣况乎昆弟親戚警欻其側者乎余之讀君詩如聞足音如接警欻悲喜交集久之仿

俚而不能去焉爾其惡能知君詩之所以工不能知君詩之所以工又安能言君詩之工乎余自從君南行君有作莫不繼聲焉其篇蓋略相等間嘗取而觀之恤恤乎湫乎攸乎若不可以終帙然則余之詩且不自知其所以爲詩又惡能知君之詩哉君曰善夫子之言詩也蓋有深於知者矣因遂書以遺之雖然後之人苟考時以論世熟復而深思其必有能知之而且有能言之者矣歲在昭陽大荒落宿月青浦同學愚弟王昶拜手書

嫩隅集卷一

上海 趙文哲 損之

發京師四首

言別忽萬里，治行不十日。登車卽天涯，握手忍倉卒。嗟予負疚身，槁悴甘自畢。陽春物不遺，奈此旣朽質。側聞征南師，初筮丈人吉。腐儒抱區區，敢與借籌密。請纓志自豪，叱馭心轉慄。有家別何悲，悲至難自述。

班馬慘不鳴，北風轉蕭蕭。岑堯廣寧門，蜿蜒盧溝橋。且盡故人意，斯須駐征輶。升沈分素定，行止踪難料。鄭重平生言，不待信久要。贈行與贈處，努力名義劬。三年別

非遠感此齒髮凋君看橋下水東逝何滔滔

男治一尊酒女縫萬里裳可憐沾裳酒不及啼痕長我
衰壯懷減豈爲家室傷上馬出門去風雲鬱飛揚功名
非所期從軍激中腸兒女苦追送日斜上河梁揮之去
非忍病婦須扶將

初程次良鄉冬景苦易暮望京無百里雲山已回互乍
經驛路塵一日變衣素依然昨宵燈照影異牕戶涼颼
從西來槭槭撼庭樹落葉戀故枝淒咽似相訴哀哉葉
不如孤根託何處馬頭春明夢夜夜向南去

良鄉客夜寄曹習菴

勸駕辭何切臨岐倍黯然加餐君兩字去國我三年浩
浩風沙色悽悽僕御緣他時索居淚早迸一燈前

酬王述菴見贈次韻

廿年香火感深盟萬里猶爲並轡行尙憶牽衣同拜母
眞從戴笠早稱兄驚看踪跡如逃劫忽對詩篇似隔生
爲話故園心轉壯要令絕域遍春耕

趙州城南舊有千秋亭是漢光武卽位處

符啓西來識功成北伐師千秋鄙邑蹟十世漢家儀地
古風雲鬱時平障堠夷無萋亭不遠大樹有危辭

驛馬行

石磊磊脫車輓沙澗澗柅車軸雙轅馬凌兢形如兩轂
棘十里五里行不速短筭長鞭日相逐馬乎甚矣憊馬
感我知以臆對生不能走千里鹽車鼓車敢言恥無端
充置郵五鬣三花徒自喜縣官養馬求牧芻束計升計
日有餘官儲日耗馬日瘦吁嗟碩鼠碩鼠難與居堠雙
復堠隻三暮三朝不一易朝行冰在蹄暮行霜在脊不
如邨舍牛負暄老翁同偃息驛卒跨馬但醉眠道斃還
聞貨馬革前身我非馬那能通馬語爾勿哀鳴步徘徊
路長日落又將瘳爾股嗚呼安得驍騰萬匹雲錦殷銜
枚夜度銅壁鐵壁關縛賊馬上唱凱還

渡漳水同述菴

風煙極目浩縱橫晚渡牽船客共爭流急勢先吞滄衛
地雄氣尙帶幽并一宵候館知安托十月輿梁苦未成

僅葺其半云須
十一月始成

每到邛須動遙感清漳夾宅負平生

衛輝道中遇吳白華話別

僕夫相告馬相呼一慟相逢一語無幾日風埃顏面改
數年昕夕笑言俱身名兩負千秋事鄉國兼違萬里塗
憂患餘生吾似寄感君辛苦問妻孥

白華夜抵淇縣復遣急足惠書却寄

土銼風燈薄病侵知君念我擁寒衾分岐苦覺含餘語

急遞欣看載好音書帖應求仁祖食覆樽彌感邴原心

分明淇水漸車處多恐今宵少夢尋

來書言家累在都必不使有索米之

苦並以辰沅而南宜節飲爲誠

將渡河至滎澤守風作

雷轉河聲怒霜侵馬色寒
逕思操檝往彌覺濟川難
地險經龍戰風高稱鶚盤
臨流重延佇客鬢感凋殘

新鄭驛舍見月季方作花偶折一枝附家書中戲

題三絕句

泱泱溪流度小車
新田南去有人家
渡河三日風光別
曲院低垣十月花

攀條把酒苦念念葉上輕埃葉底風多謝官人日相賞
不堪蕉萃驛亭中

家書兩字只平安老去秦嘉善自寬忽弄風懷寄殘朶
發函兒女笑成團

暮抵禹州述菴以事先行有作

海萍兩葉任風吹咫尺還教有合離戀北病啼原不于
圖南弱羽又差池潁橋月暗聞鐘候襄野雲荒頓轡時
三載對牀緣詎淺客心無那怕臨岐

裕州寓舍見黃楊一株蒼蔚可愛河以北所無也

黃楊高六尺冬日碧逾鮮策策攢柯密離離綴子圓就

榮初得地逃厄暫逢年生意爾如許攀枝一泣然

過南陽宛南書院悼亡友袁古雪

宛南講席溯遺風回首人琴一慟中記送素冠貧且病
幾陪彩筆敏兼工十年獨念袁絲長萬里誰憐趙壹窮
多謝候人相告語酒壚何處問黃公

驛吏述君臨
歿事甚悉

襄陽懷諸葛武侯故居五首

洵美躬耕土千秋一草廬勳名微管並出處有莘如巾
服漁樵襄川原戰陳餘定軍山下路倘憶沔南居

四海占龍臥蕭然賦考槃志原甘澹泊力足濟艱難涓
上身先殞隆中膝可安重過三顧地客淚感無端

崔徐二三子來往定欣然逸事風塵外高評月旦前襟
期梁甫曲生計漢陰田當日如終隱鴻妻亦最賢

宇宙名常在芳蹤錦水長人歌千尺栢公念百株桑涕
尙沾遺老魂應戀故鄉溪毛如可薦此地合祠堂

林壑真清絕風流彼一時如聞名士歎不負布衣知舊

井秋苔塌荒臺老樹欹彈琴人宛在下馬重威遲

武侯舊宅

有故井一見南雍州記又有避水臺武侯常登之鼓琴而爲梁父吟見荊州記

泊襄陽同述琴

岸樹川花望不分煙波如畫碧紛紛渡江帆帶樊城雨
倚堞樓含峴首雲漢上題思追勝事襄陽傳欲續遺聞

魚梁洲畔饒雞黍衡宇他時好共君

自漢水放舟南下卽事二首

襆被同登漢上槎六年不聽榜謳鴉容身已喜如居室
入夢渾疑是到家斜日趁墟宵喚酒輕烟壓水午鳴茶
南遷我久忘官樣慙見船頭候吏譁

碧波翠巘一程程細雨斜風撲面迎沙步閑容村犉臥
烟帆低傍渚禽行潤留硯墨吟初罷寒勒箒香夢未成
忽憶吳中十年事夜船燈火按銀箏

雨

楚江風急晚停橈漁鼓初迴戍鼓飄原是小牕剪燈雨

打來篷背倍瀟瀟

澤口阻淺

我乘漢江舟三日風利北川郵六百餘
長年但偃息嘿念窮途人倏假造化力
恐此非分遭前路浩難測凌晨及澤口
沙土苦填塞布帆美滿吹失勢在咫尺
冥冥雨聲沈淪淪雲氣冪蓬窻對童僕
日暮愁思迫詎云貪利涉官程懼差忒
舟人黯無語苦寒敢自惜凌兢立水中
邪許酸且激葭蘆亂無次其下雜碎石
不知兩踝傷水面忽浮赤儒生果何裨
累爾有誰恤古稱潛旣道漢乃受厥職
南流達江陵一葦利其直胡爲跬步間
坐使行

旅厄吁嗟濟川心作楫亦何益

夜宿澤口大風雨苦寒不寐作

澤口一勺水不送一葉舟一挾風雨勢如雪浪打頭南
行謂就暖未爲禦寒謀中宵擁絮被輾轉無時休邨雞
噤不號焉能辨更籌我生困津梁中年念菟裘豈知一
差跌迨遞投炎陬坎止果孰尼流行亦何求起挑篷窻
燈偶影如楚囚狂飈聽轉橫欲倒江漢流朝晴驗水誌
依然芥坳不

自澤口循江隄陸行二十餘里至田關復登舟卽

事五首

潛江三日住捨舟忽遵陸勞人故草草安便豈吾欲破
曉雨初霽艸樹靄如沐日出烟未散聞雞辨茅屋肩輿
苦欹側輿卒雜樵牧所欣風土佳笑語共僮僕宛然故
鄉景娛此異鄉目

人行在隄上人家住隄下邨舍緯風蕭間以鱗鱗瓦冬
畦如刻鏤土膏融欲瀉時見挑菜人帶雨綠盈把

種竹隄之東陰繞我屋西隄藉竹根固屋亦資藩籬直
幹以爲柱捨地攀亞枝生意走不斷風葉青青差差樹槿
苦易敗插棘刺我衣編竹誠大佳所恐束縛之春雷籜
龍怒赤手安得施

連邨少雜樹高榆間疎柳想見首夏時濃綠到谿口楚
天小搖落榆葉復何有柳枝尙垂垂微黃拂馬首柳脆
榆質堅別自匠人手耐霜乃相反此理頗難剖誰與盟
歲寒榮瘁亦其偶

捨舟復入舟客心從所如筆牀與茶竈依然得相於自
我出國門旅夢昔昔殊兀兀馱瘦馬搖搖載單車斯須
屢斷續何處尋去途連宵楚人船雨聲戰黃蘆聽風復
聽水無眠對燈孤今夕煙月澄營魂自嬉娛大江流未
央我其夢歸歟

荆楚

古郢依然問楚疆北雲南夢鬱相望論都自昔雄江介
設版從茲盡漢陽絕代風騷垂屈宋累朝諷諫接姬姜
渚宮遺事今餘幾三戶無人草樹荒

漢臨江王

百里桐封溯漢年被徵猶自望言旋餞筵有識嗟車軸
對簿無辭訴廟堧尺布斗糧空復爾金牀玉几故依然
不徒父老悲流涕飛燕啣泥上墓田

昭烈帝

得堦尺土定三分羣牧間關老使君巴蜀千盤資重鎮

襄樊一戰策奇勳沿江斷堠誠偷襲下峽連營亦憤軍
至竟英雄成底事怒濤如雪捲層雲

梁元帝

湘東文物管空斑家國紛紜淚共潛木主逾年虛遠載
角弓幾日忍先轡布車送葬何相逼璧馬徵朝亦不還
舊苑風烟苦蕭瑟白頭庾信賦江關

荆南

五經兒後鬥雞兒割據湖湘亦一時賴子未羞鄰共責
世家已見史常垂金隄捍水千犀力粉堞排雲萬雉規
雄楚樓前聽社鼓年年土主賽遺祠

明湘獻王

勝國維藩奕葉承
戾園回首怨難勝
談兵應悔誇馳掣
嗜學會聞愛翦燈
鼉錯有謀惟削奪
劉安無術更飛昇
太暉觀圯祠官罷
風雨魂歸傍孝陵

鐵女祠

鐵女祠乃在江陵城之西北隅日暮謁祠下陰風蕩瓊
疏蹲蹲兩積鐵血鏤交模糊想見躍冶日能於斷爛留
此不壞千金軀吁嗟二女信奇絕心耶骨耶兩如鐵厥
考姓孫名不傳以冶爲生在唐年淳于所坐是何罪
熒熒無處呼高天父在獄女守爐灰飛雙蓬髻淚落單布

襦門前老樹啼夜烏姊也申申妹嗚嗚緹縈苦未識一字庶幾一死可代千言書吁嗟二女窈窕妹視此百沸鑊清冷淵不如連袂駭一擲雷橐無聲炭亦熄精氣入鐵鐵不頑犬勝黃金寫顏色行人下馬拜居者羞椒蕕巋然江漢間風化式里闕君不見干將莫邪古稱至神物誰其死者鴻毛輕

趙臺卿墓

臺卿經術士慷慨使荊州志以匡扶壯身緣老病留畫圖資尙論瑩域見貽謀不共登樓客重爲鄴下游

樂戶行

明末流賊張獻忠入荊州自稱西王時惠邸樂
戶有瓊枝曼僊者以色藝擅名獻忠召以侑酒
瓊枝罵賊不屈賊脅以刃瓊枝罵愈厲曰汝技
止此耳吾何畏羣賊鬻之以飼犬而曼僊則極
其伎能爲獻忠所寵遂乘間置毒於酒以進獻
忠昵之令先飲曼僊色變不得辭飲而立斃獻
忠覺其毒亦殲其屍

獻賊來城門開王早遁官乞哀西王府中晝宴啓侑觴
才人自朱邸獻賊喜瓊枝怒樂戶雖賤非賊伍玉肌白
刃兩如雪一笑相從飛碧血獻賊怒曼僊喜樂戶誠賤

堪賊餌醜賊不飲令先飲恨不宵來殺諸枕噫吁嘻罵
賊賊怒一死輕古有之雷海青呢賊賊喜一死遲古有
之高漸離堂堂兩樂工千載耀青史不謂江陵城更有
弱女子

宋玉宅

哀怨靈均弟風流子美師江山留舊宅雲雨托微辭過
楚吾何適經秋客更悲蘭成今白髮腸斷結茅期

申包胥廟

伍員昔亡命一士力可縛如何道左偶班荆公義私仇
互然諾班處宮鞭及墓吳毒已逞楚斯怒七日哭秦庭

一戰復郢城慷慨無衣詩吹爲楚歌聲乃知古人志事
視所處迫人於險斯勿取獨不見江上漁瀨中女

江亭絕句

黃山谷夢吳城
小龍女處也

繫纜江亭下沙鷗共夕眠更無人入夢風露晞空船

漸臺行

嗟哉尾生抱柱之信誠硜硜女子有行乃利貞我哀漸
臺人試作漸亭行臺上楚王游臺下楚江流江平送王
去江漲妾獨留金環進御古有法召必以符王命妾使
行符不行水高與臺平妾願臺上死不願臺下生嗚呼
春秋二百四十年彤管之書少所可獨有兩姬姜一死

激頑濡楚臺水宋宮火

夜至沙市登舟

晚行到江市重問渡江舟沙白明漁步燈紅隱驛樓檣

烏邀水宿塞雁導川郵一昔虛聯榻尊前話未休

所雇舟楫

備仄是夕將與述莽分宿

過江至虎渡口

古岷江自今枝江縣分流東南行故禹貢云東

至於澧今北江正流並不合澧乃古之沱水自

南流日微而北流乃專受大江之名此虎口渡

猶南岸分流達澧州之遺蹟也

古渡臨江介分流近若何自東仍至澧迤北別爲沱驛
樹迴寒照汀蘆颭夕波天涯搖落感眞覺楚南多

孱陵呂侯祠

地控荆湘此最雄英名猶在霸圖空生能開卷分陰業
死得封侯尺土功竟遣白衣來北岸渾忘赤壁縱東風
湘江遙接蠓磯水嗚咽還應怨阿蒙

澧州道中寄程荆南衡州

澧水東流下洞庭蒸湘亦抱合江亭如何遠浦捐芳佩
不共佳人醉淥醺難後夢魂頻錯迕病餘書問費丁寧
蓬牕獨聽瀟瀟雨官燭無花也淚零

湖口夜泊聞鄰舟吹簫偶成五絕句寄江子九寶

慶

微波遠更平寒雨疎猶滴何處過湖船載將數聲笛
滅燭悄無語烟波轉渺然平生聞笛淚灑到洞庭船
沙柳碧無情臨風送我行誰言武夷曲多是玉關聲
人宿蘆之漪後啼青楓樹曲終不知名月落峭帆去
我行茹水外思子莫江潛忽憶青溪步瀟瀟暮雨時

滄浪水

滄浪之清如碧昔昨日濃陰今始開偶然鼓枻故人並
聊爾濯纓漁父來晉帖題柑寄書遠楚騷頌橘行吟哀

南荒遷客未蕉萃佳絕江潭首重迴

開雁和述菴

萬里孤征客程迤雁行一聲聲欲斷今夕近瀟湘

武陵

沅水清冷不作濤江城如畫接林泉此間沈黍還招屈

湘羅在今湘陰而武陵有招屈亭競渡甚盛

他日逢花定憶陶笋味貯曾論

壓擔柑香破甲喜充包開頭伐鼓舟人樂聞道灘流只

半篙

逆流水淺則勢緩易上

和述菴食筍桶有感二首

北食珍冬筍今來得飽嘗色疑衝雨劖味愛裹泥藏舊

日居鄉里輕雷度水塘
玳尖紛滿路最憶共攜筐
京雒違柑節荆湘度橘春
香盈憐觸手甘溢訝流唇
家計千頭重鄉書百顆珍
感君懷袖意繫我獨沾巾

舟中至日

草草流光駐勞勞遠道難
問人知短至掩涕話長安
江曠漁燈亂城荒戍角殘
誰憐賜辛節旅食共溪蠻

至日寄內

會說移家遠市塵

余出都後將移寓官菜園

南榮好著病餘身
客居

又度添絲節子舍初來獻襪人

子婦於今夏抵京

暇日竟須娛

棗栗故園且緩念松筠安眠斷却天涯夢
霜驛烟津捻

未真

沅江二首

我憐沅江樹夾岸碧無次搖搖送我船遠近非一致楚
雨日夜零千林振哀吹生非歲寒姿中此悲哉氣如何
轉依依對客弄蒼翠乃知古誼士飄泊隨所值別有千
古抱未敢淪槁萃攀條重裴回風葉忽交墜亦如感物
者慷慨一灑淚

我憐沅江波悠悠自千里漣漪不盈尺下有石齒齒我
乘上水船沿緣信葭葦如何臨流望不見古芳芷遠道
曷以貽微吟空倚徙將毋地氣變蘭艾隨所使亦或騷

人言寓物懷彼美扣舷我何之日暮求未已

楚貢亭

宋真宗祥符中封泰山詔求楚包茅所謂三脊者有沅江民王皓自言能辨之得以

進獻芬烈異於常茅自是遂爲常貢亭以此名王備真有楚貢亭記略

菁茅誰辨脊茸茸尙有修亭記舊供包匭已虛周職貢
芳馨偏應宋登封頓年宮觀資彝勺幾處壇壝藉璧琮
太息萊公仍放逐祇園草沒酌泉蹤

武陵甘露寺有萊公泉

經桃源縣作

兩日行桃源溪山致瀟灑縣古無城垣官衙接林野其
南綠蘿山沅水繞山下漁詠不知處流音與波瀉時於
煙樹中隱隱見廬瓦卜居洵可樂草堂貲孰捨陶公義

熙後神州徧戎馬平生抱區區未肯避蓮社夢中華胥
游託此聊自寫今時際泰和犬吠夜邨寡仙源在人間
翻笑問津假他日谿花紅我亦捕魚者

過桃源初上一灘名毛甕子

灘流清可憐阻石形勢變一望江空濛如雨復如霰槎
牙數峯峙中各通一綫石立水亦立飛浪搏人面水中
八尺篙水際百丈緯遙遙相叫呼有若赴急難當其入
險時出死力與戰昔稱倒水巖靈秀桃川冠龍溪碧玉
流茂竹紛可玩灘上爲甕子峯峯與倒水巖相望卽水
經注所云沅水東歷三石澗秀若削成
茂竹便娟政可愛玩者也龍幽景不我娛徒令飽憂患
家溪亦經此南注於沅水

何處漁仙菴聞鐘起三歎

穿石

童僕忽絕叫一峯駭鬼峩崩濤湧其足香象初渡河半
空見洞穴貫穿厥腹皤通明敞八牖竒曲藏一窩日月
互照耀雲煙疊經過不知造物者何處施斧柯作此大
狡獪奇舛脫白窠我欲拄藤杖壁立無盤陀匆匆限于
役所遇皆逝波

舟行甚遲偶書二絕

兩人恰受小溪航雨雨風風路倍長已是三朝辭枉渚

烟波何處古辰陽

楚辭朝發枉渚夕宿辰陽枉渚在今
武陵縣辰陽今辰溪縣行已三日矣

猶隔雨

丹程也

雞犬連邨亂夕煙清游回首負桃川可憐魚網溪邊柳
不繫征人上水船

暮抵白石灘乘月復行

後顧水奔壑前望山塞塗豈知一灘轉明流真渺如山
雲不成雨因峯態何殊忽與谿雲合艸樹交模糊不見
同來舟但聞煙際呼何處可小泊且就蘆中漁

月出烟霧開乘夜片帆動愧此漁舟翁水鳥正同夢我
起滅燈燭坐覺清寒重水華打船頭船尾風華送所恐
波中石牙角頗豪縱偶然貪利涉要害往輒中快意意

轉怯語僕僕勿諷灘行我何知別有驚弓痛

崖石

崖石天所縱萬變變益工曉起不暇盥拄頰風露中盤
盤積圓廩圪圪排高墉蹲蹲獸攫物矯矯禽拏空雨餘
花垂朶雷後笋迸叢累碁並累丸若堂兼若封畫手窮
皴抹賦心失形容轉喜稍平遠舒我駭歎胃巢居見木
杪欹側撐烈風其下隱幽谷樵訶去安窮茲景亦一奇
沿洄信孤篷再拜祝石丈母犯奔流衝

虎子磯

奔流忽然來一落踰一丈扁舟如巨魚騰躍不得上巒

環篙師篙簸蕩槳夫槳仗此一絲緯萬牛迴偃強崩坼
何太逼著趾不容兩可憐一失足下飽夔與魍何年懸
鐵繩穿石若施鞅嗟爾牽舟人如顛得扶杖始知矢所
依跬步限攸往

明月巖

乍脫一灘險又逢一峯奇一峯撐青空斗絕不可梯誰
於兩厓間飛橋架虹蜺想見修竹林微逕通招提鐘魚
憂雲表聲落山下谿谿流與相應杳然去何之借問鷓
鴒砦何處營苗茨暫游尙無暇慙愧津梁疲

自魚子洞抵雷洞清浪二灘怪石亘四十里爲灘

行絕險處

山無一寸石水無一寸土大星倒河漢磊磊自太古一
望吁可怪風吹髣毛豎孰陳百萬兵絕不依隊伍立者
啼怪豕臥者瞰饞虎大者亘數畝銳者卓一柱亟奔羣
相從特起旅而拒左右互衝突不知爲誰侮三疊峙龕
赭中復陣散五駭機不可踏門門激飛弩可憐孤征魂
闖然入其阻千篙與萬篙射石石轉怒上磨牙伏以伺
相顧噤邪許竟於劍戟林爭此一銖黍四十里而遙奇
弄亦何苦呼天天不驚橫空撒白雨

雷鼓數百面作氣音未絕誰將萬層浪散作炎荒雪于

時天重陰山山叫哀狹久客性命輕輕舟重超越石陣
勢忽變沿江布勁卒步步接短兵一入復一出日落路
彌長四顧氣欲奪側聞嬰鍊翁穹祠冠截薛將毋土室
病於此避毒熱灘風捲靈旗遺恨怒濤沒噉詞乞神休
臨江灑牲血我行萬里遙半途此弭節朝聽灘聲號暮
聽灘聲咽扣舷重悲歌鐵遂爲破裂

苦雨

惡灘喧十里苦雨颯五更繫舟楓葉落哀猿還亂鳴誰
令一寸腸攪此千萬聲斯地楚南裔屈子所屢經溪山
積哀怨假物鳴不平我行異流放何爲涕交傾拭涕轉

自咎太上慙忘情長安有兒女挑燈念孤征此詩不忍
寄此聲難共聽

大風過芝草白榕諸灘

夜雨聲蕭疎晝雨勢稠密山川水雲中凝望渺如一今
日灘稍平得雨翻蕩滴小舟駕長風輕矯故無匹水石
自豪縱狃勝犯倉卒中流一洄漩長年爲股栗豈知十
幅帆空際破狂猶篙櫓未及施卅里速傳驛竟以不戰
勝此理陰符述貪天亦何功靜念爽若失行人幸無恙
何啻破冢出

日暮風更橫

去

橫空與水搏水亦飛怒濤直向柁樓落

風水自相關吾命果安托瓶盎鏗有聲衣屨濕難著低
蒲二三葉一走不可縛綠溪石嶠曉未敢著吾脚進止
兩無計指顧徒駭愕天憐我淹滯亦憎灘勢惡送以飽
帆風使知壯游樂惜無萬斛舟橫海截蛟鱓小舳薄於
紙豈足試盤錯繫纜餘驚魂言就荒戍拆一望波連山
徒侶何處泊

是夕與僕
人舟相失

將至沅陵過諸灘作

橫石連九磯

俱灘名

灘勢亦浩洶石如羣羊眠所喜角不

聳舟子笑相狎不待頻戒董彎彎緯在胥活活水浮踵
兩灘半日過勞酒亟思捧汝勿向我詫母乃小敵勇

沅陵

邨墟散忽聚溪山遠且平薄雲逗林罅遙見江上城蠻
俗革已久武谿瘴煙清版田喜冬暖麥苗青青頗聞
田父語地接黔與荆比年征南旅插羽紛縱橫朝過奉
使節暮宿朝

天旌尙賴

國恩厚龜勉安犁耕官今有何急水陸馳兼程甚媿田
父意解纜鳴銅鉦爾勿妨爾業我亦從軍行

瀘溪縣

清絕瀘溪縣城臨兩面谿郭門青睬合驛候碧山齊帆

挂風初北簪懸日又西連邨知歲稔十里亂鳴雞

自白沙灘至白龍巖所見石壁甚奇紀詩二首

前賞厓石奇奇以百變勝不變變愈奇斯極看山興瀟
溪溪又南廿里石壁亘疑遭巨靈劈斬絕無阪磴言言
復仡仡一望徑且陡上積萬古苔猿鳥滑難凭陰竇滴
乳泉天寒欲成凌我思尋其源隔山斷雲磴何處樵斧
音丁丁與篙應

石巖去不窮彌嘆所歷妙混沌自太古誰爲鑿其巖嵌
厓圓如丁穴壁方似塊了了見室廬楹櫺架竒窳旁有
艇子橫水至疑可擢又有器若甌重疊弄惟肖云是僊

者居匹諸壺與嶠父云積軍儲遠自葛侯造志乘猶謬
悠俗傳豈典要我誦九歌驚巫祀遍南徼湘霧載雲旗
出入玉女導傳芭太乙祠有儼執珪瑁嗟哉山阿人蒙
翳隔陽曜薜衣生暮寒野處徒睇笑石房天所營後猶
爲除埽去庶幾風雨夕于斯藏窮窶蕙櫨兼芝楣亦或
補蘿蔦去應許楚江壘噉辭泣相弔我本離憂者偶此
展幽眺褰裳阻微波吟些不成調遠游重然疑蓬卜冀
予告

辰溪望大酉觀

瀘溪接辰溪計三舍而遙縣郭枕溪水喧喧雜漁樵堞

樓何岌岌戴以巨石牢隔岸大酉觀如霞冠單椒冷然
清磬響時逐谿雲飄頗聞闕靈冊遠自似與姚龍威守
扁鑰不使俗手鈔我思聖人心典謨已昭昭焉得有怪
牒祕之若鴻苞殆卽百篇書永並瑯環韜外或貯邱索
如鏞佐弦匏後儒亂經訓烈於秦燄燒大航及破豕萬
舌同沸蜩真本倘復出明雨螢燭消終當抉此洞不畏
風霆遭

晴

十日九風雨楚南信難居晨興喜新霽支枕臨清虛日
華散林薄射水水欲無惟見荇藻影風動石與俱一灣

抱一峯鏡裏裝束殊奈何對暄景雙眉猶未舒薄雲弄
晴姿遲遲共縈紆山容自相媚含睇翻愁予似問看山
者懷抱今何如

夜夢

夜夢一何遠吳淞尋故園老梅八九樹竹外花已繁依
然風雪中暮歸叩柴門二親宛無恙拊我有涕痕絮語
十忘九一語摧心魂謂我勿渡江風波苦崩奔我婦儼
在側爲母進晚殮亦有牽蘿人掩冉寒燈昏恍惚識已
死與我話塞垣

亡妾萬歿于去秋出塞時故見於夢者如此

舟子起解維驚

醒灘正喧鮮民今幾載殞宮委荒邨自爲長安客家祭

仗弟鼎一江戒無渡萬里逾湘沅他時幸生還何以從
九原存者天之涯亡者青楓根白頭卽長路負負無可
言

長歌行寄陸耳山

陸敬輿有荒莊趙元叔有空囊一貧至此非所恨但恨
一出入相避成參商與君結交久樂事挂人口銷夏

雲林壁上泉

壬午季夏與耳山並載至武林同寓湖上者二旬

餞春繡谷花前

酒

此已卯同游吳下事繡谷蔣氏別業也

問君昨從吳越賦皇華舊句已

籠碧紗否萬人海中藏我六載餘君亦冗寄宣南坊畔

廬

藏海冗寄子與耳山所居兩廬額也

淡淡青瑣闥滑滑白玉除十行之

詔萬卷書與君朝朝暮暮蛩駟如今春歌上

陵去秋歌出塞

屬車豹尾間簪筆兩人在偶然拍馬飲飛前草檄飛書
立而待壬午同年生與君同命鳥長安鴻泥蹤跡何足
誇別有千秋共懷抱我昨一跌君不知國門一出十步
三威遲計程謂當於此傾蓋語嗟哉楊朱之淚空灑岐
路岐行者萬里塗居者萬里心楚山淅淅水淫淫猿啼
雜鷓啼楓林連竹林孤舟載烟雨山鬼晝夜吟知君朝
回一燈對風雪夢中千巖萬壑與我同登臨陸敬輿趙
元叔曷不雲龍共追逐詩題日南至書到日東陸詠梅

倘寄艸堂篇吹笛還酬武谿曲

鷓鴣灘

遠聞水鳴灘近望雲點墨真如千鷓鴣出沒浪花自立
如怒將飛拳如倦且息踏沙去遲遲嬉雨來拍拍散布
整復斜羣居雙或隻一片清瑤流蹴沓成碎碧因之生
鷺灣橫空大於席扁舟簸其間一波更三磔大灘苦浩
淼小灘苦逼仄有大鷓鴣小鷓鴣
二灘相連茲鳥又何知矧乃水中
石安得并州翦翦此蔽江翼

雪

雪花何太苦飄泊到湘南雜雨捎篷背因風逗枕函
吟

情妨遠夢酒力縱淡談差喜晨窻裏依然翠滴嵐

寄兒子

秉淵

及女

淑
二首

乍許驚魂定俄言別恨紆追思猶錯愕頻夢轉模糊計
我書歸未知他病起無百憂緣識字休戀夜燈孤

樹護誰共咏弱女弱猶堪藥裹吾還寄羹湯汝最諳蕭

條吟雪候辛苦望雲談數盡滇黔路寧知尙楚南

予本
擬兼

程陸行今從水
約淹滯者一月

過洪江市

曉發玉湖灘晝過洪江市溪石如亂雲一望三四里宛
在水中夾有坻復有沚淺波瀾其清忽覺平不駛鏗然

點輕篙屈折行未已笑此一葉舟浮杯在曲水

薄暮上連州灘水石險惡急流處忽斷一縵舟倒
退不能止述菴遣人助挽始得上

窮冬忽殷雷遙望浪如閣崩崖倒迴谿慘澹風四作沿
緣石林中步步齒鋒鏑十夫互招招中僅一個弱并力
絕險處失勢竟一落嗟此脫纜舟退若蛇赴壑瞬息二
三里鐵鹿不能泊我時乘順流堅坐呼莫莫險阻已屢
經噩夢尙如昨伯昏分何知幼安心自度愧彼岸上人
指點互喧愕徐徐理篙檝再進意反作非君詠印須日

暮我安託

漢水灘

危灘有物憑每過風雨怒吁嗟漢水灘欲唱公母渡挽
舟八九人一趾著無處自古刀箭叢未闢一綫路舟本
藉緯行人反緣緯度不然千尺崖直下豈神助緯上復
懸緯此緯佐篙具篙以使之離緯以使之附二者一人
持不使毫髮悞船底走春霆船頭蒙晝霧見浪不見人
既見心轉怖後舟復何如急流一回顧

雨過黔陽縣

不信天真漏山城雨氣銜灘雷搖絕壁瀑雪灑高帆地
雜黔風陋溪藏楚邑巖龍標猶嘆遠去去淚盈衫

縣有龍標

城故蹟王昌
齡謫居於此

曉起寒甚推牕見千山皆白知夜來復大雪也

南行踰十月不見嶺頭梅一夜東風峭衝寒樹樹開傍
村聊繫艇臨水正御杯欲折香無所愁逢驛使迴

雪後登岸上小山眺望作

埋項逾一月寒牕如凍蠅岸石何峭蒨興發試一登滑
滑呼奚童笑倚作壽藤萬山不知名雪殘露高棱浮青
間穹翠中界白玉層峯凹不見雪英英雲自升解馭瀟
日影山氣濕欲蒸天風忽北來浩浩不可乘瓊樓不歸
去極望空峻嶒山阿有人家高低接芳塍亦或夾溪住

短垣若牽繩炊煙出深竹笑語如我磨我其賦卜居終
焉托魚魯

灘石多怪偉近所見則嵌空秀削大類吾鄉太湖
石特林立溪岸間不以少見珍耳得詩一首

楚南謂多石斯語殊憤詫灘行始信然怪很亦可怕自
過雄谿路瓏玲見頻咤十里更五里目賞苦無暇栽栽
冠劍偉冉冉笑顰旋梯雲疊三成夾水垂兩架俯峙如
鼎鼎仰承若彝竚古苔繡一片必裂四五罅玉樹灣之
東晴江見虹跨土人呼爲
仙人橋低懸半月彎橫鎖兩溪汶千
峯雪消時玉龍走其下何殊藍橋瀑跳盪各雄霸旁有

峯數朶未肯出彼勝顛米透縹瘦三品總無價我鄉笠
澤湖水石互冲瀉鼉渚龍渚間蚱蜢誇入化方此真小
巫甲乙非放亞惜哉落炎荒僅當障水壩浮泥擺枯蘆
野火延老柘樓烟烏斯巢避雨牛所舍往往放逐人於
此發悲訝我獨賀石遭幸不置臺榭神物本難馴寧堪
入罟獲未聞壺公壺可以籠岱華大小豈殊觀盛衰常
代謝平泉無百年秋風遍耕稼土花何斑斑當日覆歌
帽石丈苦無言輒遭腐儒罵不如好江山蒼蒼閱冬夏
五溪況無瘴風景比杜瀾此中豈少人筆力柳州駕爲
石發奇偉光怪斗南射終當一訪之息壤歸帆卸

大池灘

小池連大池蛟龍有重坎騎虎勢難下決進豈吾膽日
落風蕭蕭四顧墨雲灑濤頭倒如山相戒勿輕撼四舟
一心力循環互牽攬爭此命一絲諄詔聲慘慘我舟最
後發忽遇石角崐百丈呈急流舟如斷蘆颯一夫出應
募懸緯踏幽窞翻身雪浪中微見一燈閃扶石負而趨
一步猶一險前舟見相賀到岸鼓音就急傾勞酒勞驚
定生百感安得百萬夫習流號勇敢

晃州驛懷古

雙津隻堠楚黔通戍壘蕭條往蹟空三姓彝官因稍順

四州蠻峩是偏雄。畫圖尙奉誠之諱。見東坡文集金石誰誇
子厚功。至竟有苗干羽格五谿。今日總同風。

報聞集卷一終

己酉初夏六日
男秉淵恭校

姬隅集卷二

上海 趙文哲 損之

自玉屏登陸作

飽聽七十二灘聲路入羅施第一程安道恰宜乘興訪

少陵深愧寄賞情

時戴明府涵已謝邑事晨夕過從
王太守日杳遠自銅仁遣人餽贖

年鬢共飛蓬亂久客裝如落葉輕却笑花苗齊帕首扶

輿勝擁八騶行

宿果子冲有懷程魚門同年

料理天涯薄病身一燈初翦影相親忽飄老淚思前事
每到窮途戀故人難後家門愁再問劫餘文字敢重論

荒郵草草交三九舊約消寒又幾巡

鎮遠晚登太和洞

溪音嵐靄郭門烟暮景紛看洞壑偏碧樹根枯翻化石
蒼苔縫裂忽生泉風飄城鼓巖中應波颭檣燈閣下懸
不信勞生真至此佛香影裏淚潸然

文德關

寒雲如海向空瀉關門大旗北風亞橫峯橫去絕劈一

罅辛苦征人出油榨古名油榨關峒巖獨當四面衝巖門在郡

之舊亦爲洞苗出沒之所對峙難爭雄蚓連蟻結億萬族一穴不

潰泥丸封我聞殷宗鬼方三載克舜代有苗七旬格他

年金齒八關通處處磨厓勒文德

相見坡

東峯雲西峯日我從雲中來人向日邊出相見不識面
相呼不聞聲但聞層層折坂疲馬相哀鳴雜以穿林絡
石萬丈之瀑春雷驚天風動羣響啞羊腸細於絲忽露
萬山罅深深九地底一望不敢下下山猶可上山奈何
十里五里盤如螺西日隱谷雲歸阿靈夔怪魑彳亍過
行路難相見坡

偏橋

棧閣鉤連架石牢古偏橋尙鎖岑鼇控沅節鉞中承重

明設偏沅巡撫
以控制黔楚

通蜀梯航士婦豪

洪武時奢香請通黔蜀之道自偏橋始

自昔溪山紛蟻窟於今枕席度虹旄獨憐澗水都凹盡

不送滇池轉粟艘

澗溪源出黃平州之都凹山自此而上更無可通舟之水矣

飛雲巖

篠烟杉雨碧無路清梵泠泠引余步御風忽到我其僊
萬古蒼雲飛不去晴空下盤雙白龍爪甲模翎靈氣具
仙都窈窕百怪爭神物天教兩厓護髮華開處安妙容
珠絡紛垂繡幢樹玲瓏萬竅酣笙鐘不似人間奏韶韻
莊嚴法界靡不有如彼恒河細難數岩前離立三峯俱
大瀛海中嶠與壺其一蕭然山澤隴意趣孤叟不可呼

二峯淖洳如藐姑蒼玉爲骨苔爲膚罡颺吹巖落雲飛
墮地倒插青芙蓉于巖之左石作廬量之以笏十有餘
涓涓神漢疾忽徐僧指一洞爲尾閭焉知洞外天地別
問津者亦悲迷途吁嗟見垣一方果誰歟過詫烏有誠
拘墟我游汗漫此方始道逢雲將休軒渠

黃平道中

一壑雲林聚午鴉翦茅檐矮竹籬斜宜娘山下東風峭
開遍梅花狔老家

入大風洞不能窮游悵然有作

洞卽道書時蒼洞天深二十餘里貴州通志云

中有蒼龍白虎石鐘石鼓之屬潘淳大風洞記
言有高一廬者曾秉炬深入忽見天光豁然洞
外修竹茂林炊烟縷縷似有人居而大江洶涌
四面巉巖佇望不知何處比歸已二日矣予詢
諸土人云近來亦未有窮游至是者

峙蒼古洞偶一至石作天風海濤勢將崩未崩壓人頂
擾擾蛟龍塞天地忽聞春雷殷有聲石屋以外飛泉鳴
訇然元關晝不扃捫苔拄竹脚尾行半空斜掠蝙蝠翎
撲我炬火如繁星寒飈出洞寒有稜毛髮倒豎心骨驚
頗傳中藏僊者庭白日穿漏光瓏玲左踞白澤右蒼精

鐘鐘鼓鼓觴百靈別有邨墟水盈盈炊烟裊作溪雲青
喚渡惜少漁舟橫芒屨躑躅濕沮洳借問仙源定何處
此中荒怪難久留且上危亭看山去

出洞復循級而上
有石亭眺覽最勝

楊老驛道中夜行

肩輿兀兀似牽船纜及溪坊又嶺巔殘夢還家偏易斷
微吟終日總難全含霜高樹沈虛籟障月迴崖溜暗泉
最是山家逢卒歲疎籬燈火話喧闌

牟珠洞

黔之洞最奇我所游未快羈踪歲將徂勝踐日斯邁名
徵牟尼珠地納須彌芥歎戶朝煙霏穿穴午曦曬一柱

聳琳宮四隅圍石砦像設因自然跌居成不壞

初入洞有石柱

中懸柱上環刻佛像

乳泉薦晨供籟韻傳夕唄惜無宗雷緣永謝

向禽債尋幽利在雷鼓勇受以夫乍窺竅兮深稍進迫
且隘冲懣冬氣藏闇慘夜分屆攜策替桃節呼炬投管
蒯層綴雲作梯重關水爲界滑屨仰難留頽冠俯欲呈
先行試一童後至挈兩价由竇意未慚自崖興寧敗回
旋任屢探要害輒交益憑虛馭神尻歷險破天械苔衣
青可裊草帶碧堪髻磴桐轉元颺沆瀣流素瀼聲确退
之詩模劔巨然畫物態信瑰奇山心轉清灑窮搜足開
鞭樂事瓜肥齋逝將抉靈扁詎俟揲吉卦潛窟何宵寔

驚濤忽溯湃虺虺春奮霆膠膠秋起憶象罔珠自沈支

祈鎖誰解

洞中石形如門者凡三土人呼爲天門第一門高二尺許第二門僅尺餘匍匐乃入流泉

漫溢幸不深至第三門則高及一丈中懸石柱宛如根

闌號曰玉龍其下水聲如雷云有神物潛焉卽之深黑無階梯可下游者皆自崖而返矣凜乎客不從甚矣吾旣憊途窮去還

遲徑捷出翻詩興盡懸後期觀止發長喟闕略經遺桑

荒唐史徵稗撫景縈征魂揣稱賚旅話其穹壘岑樓其

廣徹官廨狹者封九泥低者覆土簣砥平或無頗縫裂

或有殺每每錯原田泱泱繞溝滄虛中鳴鐘鏞剡上列

珪玲清癯儒樞衣嚴毅士援介陰嶠伏於菟邃室居大

蔡晉葵搏而踏邱雞鬥已鍛躑躅涉波豕淋漓渡水糟

位置無定姿皴抹亦殊派衛公失品題米老徒起拜曷
爲落鬼區竟使近蠻寨旣阻問津懷枉負垂堂誠浮生
小淹泊造物大狡獪屬思窮千形落筆凌百怪如見天
門開天矯玉龍挂

柳坑行

柳坑亦名養龍坑在貴陽府治北兩山夾礮瀦
爲深潭傳有龍潛其中土人於春夏時植柳坑
畔擇良牝繫焉倏忽雷電晦冥若有物與馬交
歸而謹其芻秣必產名駒明洪武四年夏明昇
降獻馬十其白者言得於此孝陵乘以行爰月

禮於清涼山神駿如躡雲霧因賜名飛越峯命
御用監馬晉臣圖其形而學士宋濂作贊今黔
中頗產馬馵壯者絕少而柳坑尤無聞豈神物
有時而遷徙耶抑傳記所稱不盡足信耶感而
賦此

渥洼友龍果有無柳坑又說龍生駒飛越峯名錫洪武
學士作贊中消圖當時絲柳搖春日碧波蕩漾開鮫室
泥人愁絕作風雨牝馬之貞感靈匹震鱗痕隱癡涎枯
閭閻飛龍闐然出降玉錫貢來金鑿桃花作片雪作團
尋常不肯就羈勒和鈴節處趨齋壇吁嗟鍾山石馬奔

荆棘駕鼓糞田古所式唐誇沙苑漢大宛駿骨徒聞委
鋒鏑昔聞種樹得養生我於養馬知養兵烏蒙所產冠
南徼攻駒考牧蓋有經飼以苦苣細飲以薺漿清苗人
愛馬身作馬與同飢渴通性情高高懸崖百丈陡下繫
其子土其母哀號索乳始縱之翻然直決層雲走更番
練習易地同折坂通天視培塿見田山盡
烏蒙馬說乃知馬不必
致西域卒不必徵幽并因地之宜盡人力駕駘亦且奮
鬣鳴長鞭短筆竟安用我詩所感非柳坑

鎮寧曉發至白水河小憩作

難得新晴破漏天早行愛趁月娟娟露痕漸浥衣裳薄

日氣初浮草樹鮮壓擔驚雷崖走石

是日有崖石崩壑壓竹擔立碎

與密雪峽飛泉

白水河觀瀑甚奇

小溪亭上勞筋息一椀村茶

亦灑然

打鐵關

青山插天來細路白一縷晴雲千萬峯半擁關門樹與
人緣蟻進輕矯如傳羽兩肩屹不動轉側在尻股前挽
左右扶四耦相爾汝二十有四足不使愆累黍每當斗
絕處竟藉懸繩舉得非肉飛仙空際挾鞞舞登登層霄
巔天風莽撐拄羣岫如兒曹其頂手堪撫漠黔斯要衝
絡繹走徒旅塗泥雜沙礫林景翳霧雨空勞翦紙招征

魂泊無所我生亦何爲累此僕隸苦帝座信可通淚落
不能語

夜渡毛口河趨阿都田作

夜航無槳趁懸繩一縷溪烟漾水澄村曲尙聞關市柝
峯坳先見驛樓燈宵晴平野星光散候暖空山石氣蒸
料得天涯掩閨者夢魂隨我度峻嶒

雨抵白沙驛示述菴

驛舍千山裏匆匆卸薄裝雨聲移別岫雲氣擁虛堂凍
骨親爐火衰顏仗酒漿言愁愁轉劇反覺怕連床

下凌

去聲

似雨非雨簷不鳴似雪非雪花未成千樹萬樹忽團飛
絮影十里五里盡踏碎玉聲輿人呼曰凌爾雅無釋名
凌人地官職凌陰幽風篇取之在澤腹不聞降自天如
珠者霰電似拳以冰爲質質則堅不若此凌空濛吹濕
煙著地鋪作白氈瓊凌之下何霏霏寒飈乍息寒轉嚴
中人肌骨霜刃銛凌之消何活活碎石作沙冰作屑一
望陂陀泥有骨天陰凌蒙頭天晴凌沒足輿人亦良苦
凌乎胡太酷我聞未有稼其占達官怕又聞霧作淞貧
子歌飯糲異名同物說安在史志五行半茫昧揣稱倅
色凌豈殊我識天心定仁愛君不見黔山疊疊刀劒叢

嵐花溪箐蒸青紅燼燼百毒冬不蟄以凌殺之不讓三
白功嗟嗟與人爾勿哭山版明秋多十斛

宿亦資孔驛

過此卽
雲南境

踏盡黔山碧萬層荒郵還作借單僧掃花燭短渾無儼
刺水衾寒忽有稜永夜夢多情恂恍殘年詩少意膏騰
偶然折得苔枝在伴我吟窻瘦不勝

青溪洞

牟珠洞門守一龍青溪洞乃龍所宮千鱗萬爪隱現中
時見其首垂高空或掉厥尾海水從白氣四出飛濛濛
八瀛四溟一勺通化爲仙漉流琤琮耕烟之田橫復縱

無名瑤草紛青紅
苔萐萐擢芙蓉
瓊林笋迸春泥鬆
琳堂貝闕左右逢
下者元窗上碧穹
蒼壁橫檻珠挂櫺
流蘇婀娜揚冷風
龍行衙衙九子同
片雲如縷穿玲瓏
百靈來朝玉獻瓏
方圓平銳無定容
神鬣伐鼓鯨叩鐘
宴開凝碧流霞濃
還宮貴主曲未終
烟鬟霧鬢愁青銅
九張機停春晝慵
絞縮自疊千花穠
我無橘社書一封
身忽到此何其雄
昌黎南遷登祝融
陳丹暗粉趨鞠躬
東坡海市詫歲冬
絳樓翠阜嗟恁恁
如我所見贊嘆窮
造物亦苦難爲功
便思叱石作雨工
跨之萬里游鴻蒙
洞天六六雙袖籠
一洗五嶽塊壘骨

大雪抵易隆驛

頽雲四冪天無隙勁颼吹落老鴉翮役車歲晚苦未息
小關嶺前雪如席平填溪坳没山脊三邨兩邨斷行跡
牛棚雞埒壓欹側一縷炊烟裊無力谿梅衝寒寒轉勒
捨地竹枝似枯荻老松倔強頗猶昔獨向北風撐半碧
人噤無聲馬毛磔人馬相呼赴荒驛驛樓草草吾何擇
濁酒一樽蘇凍魄驛前父老笑謂客南雪到地寧易得
今年早霜損秋穡尙幸屢豐有居積雪花非花禾與麥
纔入冬畬化春液已辦高囤儲萬億更足輪邊佐軍食
我聞此語浮大白明日塗泥非所惜醉來狂歌撼鄰壁

玉戲天公勢逾劇忽憶蔡州城外十萬鐵甲兵鵝鴨聲
中夜縛賊

楊林驛

四姓蠻爭地遺墟枕暮岑人聲圍豕市

滇中作市以十二辰爲口號有

豕街龍街諸語是日值亥故云

石勢入羊林

驛舊名羊林以城東門外亂石如羊故名

擔雪

飄燈亂城颺送椽沈蠻盟臺在否上策緬攻心

寄內弟張繡堂二首

身世兩如許相看意萬重合并非我料患難得君從

入

都不及一月而予被謫又全家大病君之周旋良苦矣

宋鷁風摧翮燕鴻雪掃蹤

且依多病姊燈火話殘冬

家置三甥塾

時將以乘沖乘淳乘泗從學

人傳九日詩

君與諸名士九日集述茶

齋賦詩君詩稱擅場

華年須愛惜老輩共襟期

謂竹君習菴白華魚門諸子

京

維居非易鄉關夢正遲眠餐近何似一報遠人知

爲彭太守

理

題投經圖

忠孝承家牒循良著

御屏十年傾碩望萬里覲芳型香靜凝門戟風遲遞閣
鈴商賢原好古漢相更傳經辟咄當長晝差肩及綺齡
學將窮二酉氣已歷雙丁井汲惟脩綆鐘鏗詎寸莛義
抽絲在篋詞吐水翻餅清白懷偏切丹黃手不停是翁
眞矍鑠有子必寧馨孰廁聞弦座吾登問字亭交期欣

灑脫旅迹念飄零情托珊鞭贈

時以良馬贈行

談留玉塵聽請

纓曾

北關移節又南滇

君前守漢陽自請從軍乃移守雲南

報

國心全赤籌邊髻改青謂余衝瘴藹欲別費叮嚀栢葉
殘年盞梅花剌史廳題詩慙未學何日問趨庭

彭太守復以勺庭書院圖冊屬題書此還之

使君昔領漢濱符薦有弦匏地有壺人仰勺庭如校序

時臨講席列師儒

山長爲予同年吳君霽吳有記鐫於石

愛留陽子鏡碑

碣化匹文翁播畫圖早晚五華

雲南郡治書院名

看獻馘教思

還頌日南敷

寄徐玉厓

故鄉居本望茅衡歲酒天涯每共傾

玉厓比年居京師必至于寓邸度歲

忽遣斷魂如此別偶經噩夢尙堪驚四人同邑兼貧病

我邑任京僚者僅四人君與陸耳山若貧予與曹劍亭則貧病兼之而予所遭尤苦

三友齊年判

死生

君與予及亡友張少華同乙巳生皆里中二十餘年舊雨也

牕紙鳴風燈颭雨

聽來那似對床聲

戊子除夕

天涯滋味一燈知把酒先愁酒醒時
寄語長安小兒女今年除夕不題詩

嫩隅集卷二終

己酉立夏日
男秉淵恭校